

Cor ed energia temas da l'ura da dumondas

■ **(anr/fa) Era questa sessiun han deputadas e deputads profità da l'occaiun da far dumondas a la regenza. Dus d'els han tematisà l'abandun da l'energia nucleara e las consequenzas per il Grischun.** Ils deputads *Beat Deplazes* e *Jon Pult*, omadus da la ps Cuir, han vulì savair a chaschun da l'ura da dumondas da cusseglier guvernativ *Mario Cavigelli* la posiziun da la regenza davart l'iniziativa per l'abandun da l'energia nucleara. Quell'iniziativa vegn suttamessa al suveran la fin da quest november. «En la Strategia d'energia 2050 da la confederaziun mancan las regulaziuns per prender pass per pass or da funcziun las ovras atomaras existentas», ha ditg Deplazes, «l'iniziativa prevesa da serrar ils dus reactivs a Beznau durant l'onn 2017, il reactiv a Gösigen il 2024 ed il reactiv a Leibstadt il 2029.» L'abandun da l'energia nucleara avess, sco ch'el ha ditg, per consequenza che la valor da l'energia idraulica s'augmentass puspè. «Sustegna la regenza perquai quest'iniziativa?»

Consequenzas d'eventualas mancanzas d'electricità

Durant la sessiun d'atun ha deliberà il parlament federal la Strategia d'energia 2050 (SE2050). «Quella è facticamain

ina cuntraproposta a l'iniziativa e scumonda da construir novas ovras atomaras», ha ditg Mario Cavigelli, «sco il cussegl e parlament federal è era la regenza grischuna unanimamain cunter quest'iniziativa.» El ha declerà pertge: La cumpart da l'energia nucleara al mix d'energia svizzer s'amunta oz a circa 40 pertschient. «Sch'ins serrass gia proxim onn las ovras Mühleberg e Beznau mancassan 15 pertschient da l'energia basegnada en Svizra e cun energia regenerabla na pudessan ins en uschè curt temp betg remplazzar questa mancanza d'electricità», ha ditg il cusseglier guvernativ, «la consequenza fissan imports permanents d'energia franzosa e tudestga, quai signifitgass surtut energia nuclera ed energia producida cun charvun.» Enpli fiss periclitada cun in gea a l'iniziativa la segirezza dal provediment d'energia, ha el cuntinuà e numnà ils custs per mancanzas d'energia: «Per il chantun Turitg signifitga in di senza electricità ina milliarda francs donn, per la Ems Chemie a Domat impurtassan quests donns 50 000 fin 200 000 francs la secunda.» En connex cun in'eventuala schanza per l'energia idraulica ha punctuà Cavigelli che l'abandun da l'energia nucleara n'augmentass betg da maniera perdurabla il pretsch

da l'energia idraulica: «Perquai refusa la regenza dals set chantuns da muntogna cun 7:0 vuschs quest'iniziativa e sustegna la SE2050.»

In agid efficient tar malsognas dal cor

Angela Casanova-Maron (pld, Razén) s'ha infurmada davart in tema che occupa blera glied: «Malsognas dal cor èn globalmain la raschun da la mort la pli frequenta, sch'il cor stat airi croda la vittima per terra e chala da traier il flad. En quest mument èsi dad agir pli spert pussaivel», ha ella ditg. Per pussibilitar quest agid han vischnancas, organisaziuns e firmas cumprà ils ultims onns uschenumads defibrillaturs. I manchia però anc in'infurmaziun electronica nua che quels apparats sa chattan, ha ella menziunà, «en auters chantuns vegn sviluppada in'uschenumnada 'app' per chattar quest'infurmaziun, è quai il cas er en Grischun?» Cusseglier guvernativ *Christian Rathgeb* ha ditg che la regenza salidia ch'interpresas e privats installeschian pli e pli defibrillaturs en plazzas fermamain frequentadas sco staziuns, butias etc. «Uschia pon vegnir salvadas vitas.» Ils defibrillaturs fetschian però senn be sch'ins sappia en il cas urgent nua ch'els sa chattan, «perquai è ina 'app' che inditgescha quest'infurmaziun ina buna chaussa.» El ha infurmà ch'i sajan vegnidas sviluppadas da vart privata da questas applicaziuns, «p. ex. l'app cun num Livesaver che mussa nua ch'i sa chattan ils proxims defibrillaturs, ed ulteriurs svilups vegnan a suandar.» Ils defibrillaturs sajan vegnids sviluppads da maniera ch'era laics als sappian utilizar, ha cuntinuà cusseglier guvernativ Rathgeb, «tuttina èsi impurtant che las interpresas cuntinueschian a scolar lur impiegads areguard il diever da quels apparats.» Las uniuns da samaritans porschan curs per la reanimaziun da persunas privatas, ed ina part da quels curs è l'adiever dals defibrillaturs. «Grazia a questas iniciativas da vart privata è la regenza da l'avis ch'i nun existia da vart dal chantun actualmain naging basegn d'agir en chaussa.»



Davart las consequenzas da l'abandun da l'energia nucleara èn ils mainis dals politichers e dals experts dividids.